

四庫全書

集部

欽定四庫全書

石倉歷代詩選卷二百三十五

明 曹學佺 編

元詩五

趙孟頫

古風九首

詩亡春秋作仲尼益苦心空言恐難托指事著以深大
義炳如日萬古仰照臨鳳鳥久不至楚狂乃知音愁來

不得語起坐彈吾琴

周衰有戰國紛紛極荆秦黃金聘辯士駟馬迎從人朝
為刻骨雙鬢暮作軟血親終然智力屈奉身俱入秦

自有天地來蓬萊幾清淺人生空皓首舉世誰得見瑤
臺在何許渺渺煙波遠方舟不可渡使我空展轉

絕代有佳人被服綺與紵蛾眉秀睽媚吐詞馥若蘭清
歌啓皓齒瑤琴發哀彈一彈再三嘆聽者涕洟瀾借問
誰家子為言本邯鄲

秋風吹庭樹故葉紛以墜明月耿夜長草蟲促經緯四
序苦不淹少壯何足貴展轉復展轉寤辟不能寐昔為
閨中秀今作市門鄙豈無膏與沐甘心得憔悴

山深多悲風日暮愁我心玄雲降寒雨松栢自哀吟人
生百年後奄然閤重陰念此每不樂天路何由尋仙人
偓佺輩逍遙在青岑奈何不爾思委命重黃金

海中有奇樹粲粲珊瑚枝由來植物性無脛可推移如
何左氏子樹之白玉墀洛陽經幾戰金谷久荒夷空令

千載下聞者忽傷悲

烈風號枯條落葉滿周道原野何蕭索川流亦浩浩離
居日以遠懷思令人老功名會有時生世苦不早顧瞻
靡所騁憂心怒如擣

浮雲何方來不知竟安之飄飄隨風去汗漫以為期自
昔功名士徃徃事驅馳白駒空谷中誰能加繫維皎皎
難見容翻受世妍媸虛名誠無益不見斗與箕

有所思

思與君別來幾見芙蓉花盈盈隔秋水若在天一涯欲
涉不得去茫茫足煙霧汀洲多芳草何心米蘅杜青鳥
翺雲間錦書何時還君心雖匪石祇恐凋朱顏朱顏不
可仗那能不惆悵何如雙翡翠飛去蘭苔上

東郊

晨興理孤榜薄言東郊遊清風吹我衣入袂寒颼颼幽
花媚時節弱蔣依寒流山開碧雲斂日出白煙收曠望
得所懷欣然消我憂中流望城郭葱葱佳氣稠人生亦

已繇惠養要須周約身不願餘尚恐之所求且當置勿
念乘化終歸休

曉起川上贈友

明發不能寐獨步柳陰中秋色方浩蕩晨光乍曛曛
爍爍川上日蕭蕭樹間風葛巾吹欲墮纖絺已無功感彼
歲月駛悟此人世空悠悠竟何補山林情所鍾終期抗
高志駕言從赤松

春思

春柳黃如鷺春風揚綠波美人在何許忽若阻山河攀
條弄白日常恐歲蹉跎懷思鬱不舒佳期將奈何良辰
難驟得臨風空浩歌

贈別夾谷公二首

驅馬原隰間經時不遑休昔來日在斗今去夢已秋王
事有裨益宴安非所求翩翩晨風翼一舉逝莫留誰令
匏瓜繫自懷離別憂

青青蕙蘭花含英在中林春風不披拂胡能見幽心相

去千里餘會合大江南促席談自古知我一何深此別
雖非遠懷思渺難任公其愛體素尚無金玉音

桐廬道中

歷歷山水郡行行襟袍清兩崖東滄江扁舟此宵征卧
聞灘聲壯起見渚煙橫西風林木淨落日沙水明高旻
衆星出東嶺素月生舟子棹歌發含詞感人情情苦
不遠東山有遺聲豈不懷燕居簡書趣期程優游恐不
免驅馳竟何成我生悠悠者何日遂歸耕

寄鮮于伯幾

廊廟不乏才江湖多隱淪之子稱吏隱才高非衆鄰脫
身軒冕場築屋西湖濱開湖弄玉琴臨池書練裙雷文
絜周鼎鹿鳴娛嘉賓圖書左右列花竹自清新賦詩凌
鮑謝往往絕埃塵我生雖寡諧一見夙昔親誤落塵罔
中四度京華春澤雉歡畜樊白鷗誰能馴

題歸去來圖

生世各有時出處非偶然淵明賦歸來佳處未易言後

人多慕之效顰惑姪妍終然不能去俛仰塵埃間斯人
真有道名與日月懸青松卓然操黃華霜中鮮葉官亦
易耳忍窮北窓眠撫卷常三嘆世久無此賢

題耕織圖二十四首

正月耕

田家重元日置酒會鄰里小大易新衣相戒未明起老
翁年已邁含笑弄孫子老嫗惠且慈白髮被兩耳杯棹
且羅列飲食致甘旨相呼團團坐聊慰衰暮齒田硯藉

人力糞壤要鋤理新歲不敢閒農事自茲始

二月

東風吹原野地凍亦已銷早覺農事動荷鋤過相招遲
遲朝日上炊煙出林梢土膏脉既起良耜利若刀高低
徧翻墾宿草不待曉幼婦頗能家井臼常自操散灰緣
舊俗門逕環周遭所冀歲有成殷勤在今朝

三月

良農知土性肥瘠有不同時至萬物生芽蘖由地中秉

耒向畎畝忽徧西與東舉家往于田勞瘁在爾農春雨
及時降被野何濛濛垂茲各布種庶望西成功培根利
秋實仰天望年豐但使陰陽和自然倉廩充

四月

孟夏土加潤苗生無近遠漫漫冒淺陂芄芄被長阪嘉
穀雖已值惡草亦滋蔓君子與小人並處必為患朝朝
荷鋤往娘耨忘疲倦早隨鳥雀起歸與牛羊晚有婦念
將饑過午可無飯一飽不易得念此獨長嘆

五月

仲夏苦雨乾二麥先後熟南風吹隴畝惠氣散清淑是
為農夫慶所望實其腹沽酒醉比鄰語笑聲滿屋紛然
收穫罷高廩起相屬有周成王業后稷播百穀皇天貽
耒耜長世自茲卜願言仍歲稔四海盡蒙福

六月

當晝耘水田農夫亦良苦赤日背欲裂白汗灑如雨匍
匐行水中泥淖及腰脅新苗抽利劒割膚何痛楚夫耘

婦當饑奔走及亭午無時暫休息不得避炎暑誰憐萬
民食粒粒非易取願陳知稼穡無逸傳自古

七月

大火既西流涼風日淒厲古人重稼穡力田在匪懈郊
行省農事禾黍何旆旆碾以他山石玉粒使人愛大祀
須粢盛一一稽古制是為五穀長異彼稊與稗炊之香
且美可用享上帝豈惟足食人一飽有所待

八月

白露下百草莖葉日紛委是時禾黍登充積徧鄙鄙在
郊既千庾入邑復萬軌人言田家樂此樂誰可比租賦
以輸官所餘足儲峙不然風雪至淒餒及妻子優游茅
簷下庶可以足歲太平元有象治世乃如此

九月

大家饒采麵何啻百室盈縱復人力多舂磨常不停激
水轉大輪礧碾亦易成古人有機智用之可厚生朝出
連百車暮入還滿庭勾稽數多少必假布算精小人好

爭利晝夜心營營君子貴知足知足萬慮輕

十月

孟冬農事畢穀粟既已藏彌望四野空繁結亦在場朝
廷政方理庶事和陰陽所以頻歲登不憂旱與蝗置酒
燕鄉里尊老列上行穀羞不厭多魚羔復烹羊縱飲窮
日夕為樂殊未央禱天祝聖人萬年長壽昌

十一月

農家值豐年樂事日熙熙黑黍可釀酒在牢羊豕肥東

隣有一女西隣有一兒兒年十五六女大亦可筭財禮
不求備多少取隨宜冬前與冬後婚嫁利此時但願子
孫多門戶可扶持女當力蠶桑男當力耕耔

十二月

一日不力作一日食不足慘淡歲云暮風雪入破屋老
農氣力衰偻僂腰背曲索綯民事急晝夜互相續飯牛
飲牛肥茭葦亦預蓄蹇驢雖劣弱挽車致百斛農家極
勞苦歲豈恒稔熟能知稼穡艱天下自蒙福

正月

織

正月新獻歲最先理農器女工並時興蠶室臨期治初陽力未勝早春尚寒氣窓戶當奧密勿使風雨至田疇耕耨動敢不修耒耜經冬牛刀弱相戒勤飯飼萬事非預備倉卒恐不易田家亦良苦捨此復何計

二月

仲春凍初解陽氣方滿盈旭日照原野萬物皆欣榮是時可種桑挿地易抽萌列樹徧阡陌東西各縱橫豈惟

籬落間採葉嬋遠行大哉皇元化四海無交兵種桑日
已廣彌望綠雲平匪惟錦綺謀祇以厚民生

三月

三月蠶始生纖細如牛毛婉孌閨中女素手握金刀切
葉以飼之擁紙散周遭庭樹鳴黃鳥發聲和且嬌蠶饑
當採桑何暇事遊遊田時人力少丈夫方種苗相將挽
長條盈筐不終朝數口望無寒敢辭終歲勞

四月

四月夏氣清蠶大已屬眠高首何昂昂蛾眉復娟娟不
憂桑葉少徧野如綠烟相呼携筐去迢遞立遠阡梯空
伐條枚葉上露未乾蠶饑當早歸秉心靜以專飭躬修
婦事黽勉當盛年救忙多女伴笑語方喧然

五月

五月夏以半谷鶯先弄晨老蠶成雪繭吐絲亂紛紜伐
輦作簿曲束縛齊榛榛黃者黃如金白者白如銀爛然
滿筐筥愛此顏色新欣欣舉家喜稍慰經時勤有客過

相問笑聲聞四隣論功何所歸再拜謝蠶神

六月

釜下燒桑柴取繭投釜中纖纖女兒手抽絲疾如風田
家五六月綠樹陰相蒙但聞綠車響遠接村西東旬日
可經絹弗憂杼柚空婦人能蠶桑家道當不窮更望時
雨足二麥亦稍豐沽酒及時飲醉倒姑與翁

七月

七月暑尚熾長日弄機杼頭髻不暇梳揮手汗如雨嚶

嚶時鳥鳴灼灼紅榴吐何心娛耳目往來亡偃僂織為
機中素老幼要紉補青燈照夜梭蟋蟀窓外語辛勤亦
何有身體衣幾縷嫁為田家婦歲歲服勞苦

八月

池水何洋洋漚麻水中央數日麻可取引過兩手長織
綃能幾時織布已復忙依依小兒女歲晚嘆無裳布襦
不掩脰念之熱中腸朝緝滿一籃暮緝滿一筐行看機
中布計日漸可量我衣苟已成不憂天早霜

九月

季秋霜露降凜凜寒氣生是月當授衣有布織未成天
寒催刀尺機杼可無營教女學紡繭舉足疾且輕舍南
與舍北嘒嘒聞車聲通都富豪家華屋貯娉婷被服雜
羅綺五色相間明聽說貧家女惻然當動情

十月

豐年禾黍登農心稍逸樂小兒漸長大終歲荷鋤鑿目
不識一字每念心作惡東隣方迎師收拾令入學後月

日南至相賀因舊俗為女裁新衣修短巧量度龜手事
塞向庶禦北風虐人生真可嘆至老長力作

十一月

冬至陽來復草木潛滋萌君子重其然吾道自此亨父
母坐堂上子孫列前榮再拜稱上壽所願百福并人生
屬明時四海方太平民無札瘥者厚澤敷羣情衣食苟
給足禮義自此生願言興學校庶幾教化成

十二月

忽忽歲將盡人事可稍休寒風吹桑林日夕聲颼颼
南地不凍墾掘為坑溝斫桑埋其中明年芽早抽是月
浴蠶種自古相傳流蠶出易脫殼絲纈亦倍收及時不
努力知有來歲否手凍不足惜冀免號寒憂

慶壽僧舍即事

白雨映青松蕭颯酒朱閣稍覺暑氣銷微涼度疎箔客
居秋寺古心跡俱寂寞夕蟲鳴階砌孤螢炯叢薄展轉
懷故鄉時聞風鳴鐸

幽獨

獨坐不自聊披草尋幽逕夕陽在高林籬落有餘映依
依增遠想歷歷生晚聽涼蟬軋鳴箏候蟲擊清磬大小
皆有從雄雌各相應沉吟復躊躇忽覺西山暝

興中府題見山樓

東北有高樓迢遞數十尺朝霞映窓牖浮雲來几席莽
蒼一望間翠律千峰碧青山何處無所見多迫近偉哉
醫無問周禮載簡冊我雖身未到心想已何索但惜道

里賒處地遠且僻嘉彼樓居子不受世故役愛山如愛
客相對樂晨夕應笑平地人塵埃坐充斥

寄題杜尊師白雲菴瓊秀亭

瓊山發天秀珠泉表地靈柔蕙吐丹葩喬林標絳英酌
醴吸冲和汲澗漱甘清石門開洞府水龍走巖扃清飈
一時至四座浮幽馨閨風何必遠世塵空自冥從遊當
有期淹留詎無成左手擷紫芝右手采黃菁振衣涉崇
岡遐觀散神情長嘯烟霧裏滿空鸞鶴聲

題西溪圖贈鮮于伯幾

山林忽然在我眼攬袂欲遊嗟已遠
長松謾謾含蒼烟平川茫茫際曾巘
大梁鯨華天下稀走馬鬪雞夜忘歸
君獨胡為甘寂莫坐對山水娛清暉
西溪先生奇崛士正可着之巖石裏
數間茅屋破不修中有神光發奇字
綠蘋齊葉白芒生送君江南空復情
相思萬里不可見時對此圖雙眼明

送高仁卿還湖州

昔年東吳望幽燕長路北走如登天捉來官府竟何補
還望故鄉心惘然江南冬煖花亂發朔方苦寒氣又偏
木皮三寸冰六尺面額欲裂凍折絃盧溝強弩射不過
騎馬徑度不用船宦遊遠客非所習狐貉不具綈袍穿
京師宜富不宜薄青衫駿馬爭騰騫南隣吹笙厭梁肉
北里鼓瑟羅姝妍淒涼朝士有何意瘦童羸騎雞鳴前
太倉粟陳未易糴中都俸薄難裹纏爾來方士頗向用
讀書不若燒丹鉛故人聞之應見笑如此不歸殊可憐

長林豐草我所愛羈勒未脫無由緣高侯遠來肯顧我
裏茗抱被來同眠青燈耿耿照土屋白日薄薄無葦簾
破愁為笑出軟語寄書妻孥無一錢江湖浩渺足春水
鳬鴈滅沒橫秋烟何當乞身歸故里圖書堆裏消殘年

題商德符學士桃源春曉圖

宿雲初散青山濕落紅繽紛溪水急桃花源裏得春多
洞口春烟搖綠蘿綠蘿搖烟掛絕壁飛流直下三千尺
瑤草離離滿澗阿長松落落凌空碧雞鳴犬吠自成村

居人至老不相識瀛洲仙客知仙路點染丹青寄輕素
何處有山如此圖移家欲向山中住

春寒

夜雨鳴高枕春寒入敝袍時光自花柳吾意豈蓬蒿失
色黃金盡知音白雪高山林隱未得空覺此生勞

雪後同子俊遊何山次韻

同是清閒客俱為放浪遊晴山依雪壯野水帶冰流風
急松杉亂季登薺麥收生涯雖未老吾欲覓菟裘

重遊弁山

出郭聞鶯語穿林散馬蹄
澗松何鬱鬱春草又萋萋
白石那堪煮丹巖尚可梯
平生愛高興只合此幽棲
竹色迷行徑松聲洶座隅
水清花自照風暖鳥相呼
飲罷思棋局歌長缺唾壺
重來瀟洒地聊足慰須臾

次韻陳無逸中秋月食風雨不見

豁月當圓夜看雲起暮愁
曾陰連積水伏雨暗清秋
白壁難容玷明珠不可求
每因觀節物轉覺此生浮

次韻馮伯田秋興

風緊草木變露寒沙水清蕭蘭嗟共悴鷓鴣忍先鳴黃
閣非吾事青山不世情浩歌聊感激裘馬任肥輕

送楊幼澄教授歸江西兼寄吳幼清

客裏相從久愁中欲別難此行登仕版未覺負儒冠北
度憐江總東歸憶幼安著書應滿屋妙處共誰看

送李青甫御史出按四川

蜀道青天上繡衣驄馬行霜威御史府春色錦官城萬

里平安報三年菽水清相逢一杯酒似為別離傾

謝日林贈湖石次韻

怪石曾聽法來從不二門玲瓏浮磬韻斑駁古苔痕池
月巖邊上春雲水面屯微君能輒贈此意向誰論

和姚子敬秋懷

搔首風塵雙短髻側身天地一儒冠中原人物思王猛
江左功名愧謝安苜蓿秋高戎馬健江湖日短白鷗寒
金尊綠酒無錢共安得愁中却暫歡

吳宮烟冷水空流
慘淡風霜暗九秋
禾黍故基曾駐輦
芙蓉高閣迥添愁
繡楹錦柱蛟龍泣
金沓瑤階鹿豕遊
宋玉平生最蕭索
還將九辯賦離憂

聞擣衣

露下碧梧秋滿天
砧聲不斷思綿綿
北來風俗猶存古
南度衣冠不及前
苜蓿總肥宛騷裊
琵琶曾泣漢嬋娟
人間俯仰成今昔
何待他年始惘然

題岳王墓

岳王墳上草離離秋色荒涼石獸危南度君臣輕社稷
中原父老望旌旗英雄一死嗟何及天下中分遂不支
莫向西湖歌此曲水光山色不勝悲

溪上

溪上春風吹柳花溪頭春水淨泥沙白鷗自信無機事
元鳥猶知有歲華錦纜牙檣非昨夢鳳笙龍管是誰家
令人苦憶東陵子擬問田園學種瓜

次韻剛父無逸遊南山作

絕頂清秋凌翠烟登臨應費酒如川平生能着幾兩屐
負郭何須二頃田初日出雲光射地雙溪入湖波接天
升高望遠我所愛青壁有路何當緣

次韻子俊

歲云暮矣役車休蟋蟀在堂增客愁少年風月悲清夜
故國山光入素秋佳菊已開摧節物扁舟欲買訪林丘
從今放浪形骸外何處人間着厭留

次韻本齋先生即事

重攬衣裘敝更寬
徂季欲暮氣先寒
雨中百草難為思
霜後黃花尚耐看
千古清真耆舊傳
半生辛苦腐儒冠
便應築室山阿去
嘉與斯人賦考槃

次韻信仲晚興

蕭蕭殘照晚當樓
寒葉疎雲亂客愁
歲月蹉跎星北指
乾坤浩蕩水東流
古來人物俱黃土
少日心情在一丘
獨立無言風滿袖
青山相對共悠悠

次韻王時觀

相思吳越動經季一見情深重惘然草木變衰人易老
江湖牢落雁難前秦山半出青天外禹穴遙臨古道邊
欲說舊遊渾似夢何時重上剡溪船

紀舊遊

二月江南嬰亂飛百花千樹柳依依落紅無數迷歌扇
嫩綠多情妬舞衣金鴨焚香川上暝畫船過鼓月中歸
如今寂寞東風裏把酒無言對夕暉

見章得一詩因次其韻

水色清漣日色黃梨花淡白柳花香即看時節推人事
更覺春愁惱客腸無酒難供陶令飲從人皆笑酴生狂
城南風暖遊人少自在晴絲百尺長

次韻帥初

吳越相望三十年相逢意氣共翩翩長歌白石徒為爾
遠訪丹砂亦偶然海氣昏昏雲拂地江風颯颯雨連天
他時別後相思處欲問山陰雪後船

贈周景遠田師孟

與子同客帝王州一日不見如三秋風高氣肅雁聲急
天清日暖蛛絲遊籬下黃花為誰有水邊紅樹令人愁
世間萬事可撥遣日日痛飲醉即休

送劉天錫鎮守鄂州

將軍好武更敦書執戟多年衛帝居
扈蹕慣騎天育馬分符真食武昌魚
弓刀行色寒逾壯尊酒風流澹有餘
江路梅花正堪折未應能向故人疎

次韻左轄相公

昔年閭里自浮沉郎省那知遂有今老去馮唐堪底用
愁來莊叟向誰吟上林柳色春猶淺西塞桃花水正深
知己如今居鼎鼐不應長此泣南音

初到濟南

自笑平生少宦情龍鍾四十二專城青山歷歷空懷古
流水洋洋盡著名官府簿書何日了田園歸計有時成
道逢黃髮驚相問只恐斯人是伏生

趵突泉

灤水發源天下無平地湧出白玉壺谷虛久恐元氣泄
歲旱不愁東海枯雲霧氣蒸華不注波濤聲震大明湖
時來泉上濯塵土冰雪滿懷清興孤

繼鄭鵬南書懷

豈不懷歸苦未閒宦情羈思不成歡可能治郡如龔遂
只合臨流似幼安棋局懶從先處着醫方留取用時看
夜來夢到茗溪上一枕清風五月寒

贈圖卜特穆爾總管

將軍鐵馬擁琬弓壯歲分符鎮越中山水多情留賀監
兒童拍手愛山公紫髯似戟君猶健白髮如絲我已翁
悅禮敦書殊不忝看君真有古人風

玉簾泉

飛泉如玉簾直下數千尺新月橫簾鈎遙遙掛碧空

老人峰

有石象老人宛然如繪素稽首禮南極蒼蒼在烟霧

曉起聞鶯

暑氣曉來清時時聞遠鶯還思故園路松下綠苔生

戲題僧惟堯墨梅

蕭洒孤山半樹春素衣誰遣化緇塵何如澹月微雲夜
照影西湖自寫真

喜晴

久雨厭厭愁殺人晚晴猶得見青春急須走馬西湖上
楊柳淡金如麴塵

和黃景杜雪中即事

君說江南苦未歸
香橙新酒蟹螯肥
何當與子扁舟去
共挽清溪浣客衣

當年臨水照春衫
浮玉山前水似藍
歸計未成羈思惡
為君飛夢到城南

附鮮于樞詩

望嶧山

東方巨鎮宗岱宗
羣山列侍臣妾同
西南崛起一萬仞
却立不屈如爭雄
何年天星下天宮
墜地化作青芙蓉

外如刻削中空同閭風元圃遙相通我昔東遊訪青童
羣仙招我遊中峯悔不絕粒巢雲松失身誤落塵網中
如今可望不可到艤舟空羨冥飛鴻神仙可學事亦晚
安用屑屑悲秋蓬吾聞嶧陽有孤桐鳳凰鳴處朝陽紅
安得斲為寶琴瑟獻天子為民解愠歌南風

退宮人引

駝絨綉帽紅顴頰素髮微連細紗結出宮嫁作海商妻
裙腰尚帶河西摺少季十五二十時中官教得行步齊

春羅夜翦繡花帖堦前夜舞高夢麗寵姬當前翠衿小
便覺中原美人少金蓮斜抱捧珠龍玉龍倒掛收香鳥
年年宮中春日長小車銀甕蒲萄香香殿吹簫鳳凰語
一日丹宴諸侯王舞困樓蘭過三十內家別選娥眉入
雖名伴送半無家旋賣珠環問親戚一為商婦始自憐
十年不見回番船年多不記教坊曲時時尋撥相思絃

題陳希夷像

花項君王瓦棺冷柴家陵上西風緊殿前點簡最知名

醉眼摩挲睨周鼎白晝龍虎行天階紫微小星何借哉
先生大笑出門去明日華山歸去來山色還如舊時好
流水小橋散芳草千載誰知驢背心芒碭雲深入孤鳥
汴城峨峨汴水流江南江北數百州秦王未已晉王起
人間萬歲更千秋

石橋山留題

旁通日月上星辰有路遙應接玉京仙奕未終人物換
秦鞭不到海波平當時混沌誰知鑿他日崆峒強自名

枯樹重榮事尤異欲從樵者問長生

駕政柳林隨侍

仙仗平明擁翠華景陽鐘發海東霞千官捧日臨春殿
萬騎屯雲動曉沙白鷁翻山霧薄黃龍旗拂柳風斜
太平氣象同民樂南北梯航共一家

送元復初

江流脉脉草離離黃鶴磯頭酒一卮報國寸心憐我老
論交半面識君遲正當重鼎調梅日又是長亭折柳時

滿載詩書歸路穩鳳城依約更相期

建德溪行

山截溪將斷川迴路忽通鳥飛青嶂裏人語翠微中
元圃參差是桃源想像同平生苦行役翻愛石尤風

過桐廬漏港灘

驚流激長灘百折怒未已篙師與水爭退尺進纔咫
技窮解衣下力排過乃止維時春夏交冰雪寒墮趾
我時卧舟中起視額有泚迂疎一何補辛苦愧舟子

華鯨引

石上桐孫美如玉化作長鯨喚僧鬻香嚴一擊六根開
剝落皮毛換丹骨中郎却顧中散驚初非爨下鳴不平
披鱗拔角就繩墨龍門綠綺瘖無聲昔聞北溟魚化作
天池鵬今見橫海姿解作威鳳鳴蕭然敗棺材蠹爾牛
欄撐龍騰虎變固有待不遇賞音徒爾靈君不見飯牛
自賣亦何者逢時自致千秋名

石倉歷代詩選卷二百三十五

欽定四庫全書

石倉歷代詩選卷二百三十六

明 曹學佺 編

元詩六

鄧文原

雨中次范德機見寄雜興韻

窮巷積陰雨離居寡悰情安得埽埃風逍遙余上征長
日有逝川春花無晚榮永懷山澤居好遯潛英聲於陵

方灌園龐公不入城此意豈忘世詠歌以濯清今我夢
江國嗷嗷鵲鳩鳴不憂芳草歇但恐白髮生歸休企前
哲矢言著貞誠悠悠莫識察思子携手行

題丁氏松澗圖

天目之峰凌紫烟下周林壑紆長川清池斗絕涵倒影
神運直自疏鑿先彼美幽貞廬間房曲奧辛夷荃蒼官
手植經幾年靈蚪夭矯今參天門前朝流暮流水但聞
激石瀉瀨鳴濺濺山人養真衡茅下有書可讀琴可弦

意行清澗曲長嘯松風前山月出林高溪花弄春妍
人欲來夜將半天空鶴唳山淒然颺塵大笑狂馳子口
誦丹訣傳真玄我欲從之結隣屋得疏藥圃謀芝田

陪高彥敬遊南山

不到南山又二年離離秋草映寒泉東林蕭散開蓮社
西晉風流棹酒船古寺雲烟終日合長松風雨半空懸
謝公未了登臨興故向禪房借榻眠

都中送元傑道士南歸

授節仙山得過家都門津柳動春華還鄉近似千年鶴
奉使榮於八月槎古井雲封丹竈藥舊松風掃石壇花
道人冠劍鳴瑤珮豈必高車晝錦誇

奉題延祐宸翰

欽惟仁宗上承祖武蒐羅俊彥求治匪寧尤尊禮
儒臣務敦風化由是治書侍御史臣郭貫擢禮部
尚書凡在選者六人惟貫進秩有加親洒宸翰昭示
龍光忝備臣僚咸增鼓舞集賢直學士臣鄧文原

謹拜手稽首而作詩曰

宵旰需賢表薦紳秩宗首選賢華勛官睽天府璇璣象
帝闡河圖琬琰文曾聽簫韶瞻曉日仰攀弓劍泣秋雲
小臣作頌稱仁聖湛露承恩未足云

題小薛王畫鹿

禮樂河間雅好儒曾陪校獵奉鑾輿書長靈園觀游後
政暇嘉賓燕集餘蛺蝶圖工人去久騶虞詩好化行初
宗藩翰墨留琬瑋賞憑仗相如賦子虛

題謝氏通濟橋

潯陽川上壓雲濤，迥若仙山駕巨鼇。
礎石不愁僧路滑，傾金寧計鬼工勞。
泛槎客去銀河近，題柱人歸玉壘高。
此地通津足佳興，楚歌明月放輕舠。

郎中蘇公哀挽

志道

塞垣重鎮雪雲堆，畫諾人稱幕府材。
流馬道艱逢歲儉，涸魚民病得春回。
陽關猶記歌三疊，杜老俄成賦八哀。
夜靜燕臺山月冷，祇疑化鶴一歸來。

送李彥謙西臺

霜風十月長安道健鶻凌空淨羽毛地控函關西極重
星聯執法太微高鑄金古鼎奸先伏發辦新硎用欲韜
雅志澄清付公等我懷江漢放漁舸

送鮮于伯機之官浙東

衣冠文獻叅諸老臺閣功名負此公十載黃塵看去馬
萬山青眼送飛鴻揮毫對客風生座載酒論詩月滿篷
昭世需材公論定起分春雨浙江東

送張綱父教官

我友白蘋洲畔客，忽凌風雪問征途。
南州歲晚尋高士，西塞煙深憶釣徒。
呼酒江船春水動，讀書山館雨燈孤。
無錢自愧蘇司業，聊賦驪駒為子娛。

贈趙鍊師奉祠南海會稽

函香南國羽衣師，乘曉稽山謁禹祠。
使馭穩如乘白鶴，仙都歸及采元芝。
文園進藁無封禪，宣室求言有受釐。
書帛會同靈貺濶，詞人休謬九歌辭。

送白君舉

崑崙西日水東溟何處清風起獨醒
遠道雲煙今古樹行人朝暮短長亭
草鋪平野春如剪花落重門晝自扃
不有茅茨容嘯傲終南山色為誰青

送劉時可還括蒼兼寄洪中行

洪郎不來魚雁稀君今歲暮告我歸
故人青燈山水屋游子白苧風雪衣
時俗俛仰妨道性聖哲出處存天機
東還石門對飛瀑卧看寒月投窗扉

正旦有感

干戈短景去匆匆回首南朝已夢中
世事盡隨天道北春正依舊斗杓東
一時玉燭堪調燮萬國車書想混同
寂寞荒山老松樹看渠梅柳競春風

清明省墓

短棹吳歌花滿川春帆愁斷蓼莪篇
小溪蘋藻墻間祭春雨桑麻墓下田
黃壤有靈終異土青山無樹半荒阡
傷哉巴峽松楸路孤鬼蒼寒六十年

送姚利用入京

雪晴川淨駕飛輓舟入河水二月開壯士不緣彈鋏去
故山曾見爛柯來上林淑氣催花柳盛代英雄擢草萊
青眼諸賢如問訊為言衰病懶登臺

子昂畫馬

奔騰駿骨雲路長瀟灑神鬃風露涼沙場春牧草肥雨
野微秋嘶楓殞霜三關戰士黃金甲五陵俠客紅絲韁
朝羈暮絡祇腸斷華山煙樹遙蒼蒼

題陶淵明像

詩中甲子春秋筆籬下黃花雨露枝
便向斜川頻載酒
風光不似義熙時

附宋无詩

字子虛
吳郡人

公莫舞

公莫舞公莫舞鴻門王氣歸真主
何人睚眦赤龍子
手循玉玦目相語
令公莫舞公楚舞
劍光射日白虹吐
人發殺機天不與
撞斗帳中唉亞父
霸業明朝棄如土

妾薄命

雲母屏珠春冰鮫女織綃蟬翼輕比妾妾薄命比君君
薄情紅綿拭鏡照膽明還疑妾貌非傾城傾城從來有
人妬況復君心不如故故人心尚峰九疑新妾那能無
故時補天天不高填海海不深不食蓮葍不知妾心

烏夜啼

露華洗天天墮水燭光燒雲半空紫西施夜醉芙蓉洲
金絲玉簧咽清秋鼙鼓鞭月行春雷洞房花霧酣不回

宮中夜夜啼栖鳥美人日日歌吳歎吳王國破歌聲絕
鬼火青熒生碧血千年壞塚穴狐兔烏銜紙錢掛枯樹
髑髏無語滿眼泥曾見吳王歌舞時烏夜啼啼為誰身
前歡樂身後悲空留琴怨傳相思烏夜啼啼別離

夷齊

干戈爰及父君間叩馬難令木主還向使曾飡周粟活
千年誰說首陽山

豫讓

遇我從來國士希報仇伏劍未為非倘逢智伯重泉下
莫訴深讐但擊衣

毛遂

兩國從衡倚爭臣誰為脫穎出囊珍縱饒得與銅盆軟
十九人皆碌碌人

王蠋

全齊拱手受燕兵義士能為國重輕七十二城皆北面
一時攄憤獨書生

甘羅

函谷關中富列侯黃童亦僭上卿謀此時園綺猶年少
甘隱商山到白頭

馬援

賈胡穴室寄殘軀心逐飛鳶墮海隅只為瘴鄉無藥物
故將薏苡當明珠

通子

但覓家中梨栗嘗不拈紙筆學文章乃翁臨老投蓮社

解舉籃輿亦自強

綠珠

紅粉捐軀為主家明珠十斛委泥沙年年金谷園中燕
銜取香泥葬落花

李三郎

獨跨青驄棧閣間華清休憶夜鳴鸞空教萬馬盤旋舞
不濟崎嶇蜀道難

徐佐卿

化作遼東羽翼回
適逢沙苑獵弦開
寧知萬里青城客
直待他年箭主來

關盼盼

妾未成灰鬢已霜
啼紅十載唾茸窗
香魂若作樓中燕
一世孤飛不肯雙

秦娘

太守風流寵秦娘
歌成樂府屬劉郎
一般女子皋橋住
底事無人詠孟光

馮道

亡國降臣固位難
癡頑老子幾朝官
朝梁暮晉渾閑事
更捨殘骸與契丹

王介甫

投老歸耕白下田
青苗猶未罷民錢
半山春色多桃李
無奈花飛怨杜鵑

西湖

故都日日望迴鑾
錦繡湖山醉裏看
戀著銷金鍋子帳

龍沙忘却兩宮寒

王婉容

貞烈那堪強暴求
玉顏甘沒塞垣秋
孤墳若是隣青塚
地下昭君亦見羞

秦少游女

父貶膝陰老淚潛
黃金誰贖蔡姬還
看來一抹微雲恨
直送娥眉出漢關

岳武穆

尅復神州指掌間
永昌陵側詔師還
丹心一片栖霞月
猶照中原萬里山

陸君實

六鼇海上失鑿輿
天柱臣難隻手扶
應有二姬魂尚在
至今何處望蒼梧



石倉歷代詩選卷二百三十六

欽定四庫全書

集部

石倉歷代詩選卷二百二十八

七上至
八

詳校官庶吉士臣范逢恩

侍讀臣孫球覆勘

總校官進士臣朱鈐

校對官中書臣葉蘭

謄錄監生臣姚元嶺

欽定四庫全書

石倉歷代詩選卷二百三十七上

明 曹學佺 編

元詩七上

雅琥

寄南臺御史達兼善

白溝秋水帝城邊
曉發河南使者船
契濶山川將萬里
飄零歲月又三年
雲間快覩冥冥鳳
海上愁看跼跼鳶

經術匡君須我輩莫將離恨染華顛

汴梁懷古

花石岡前麋鹿過中原秋色動闌河
欲詢故國傷心事忍聽前朝皓齒歌
蔓草有風嘶石馬荆榛無月泣銅駝
人間富貴皆如夢不獨興亡感慨多

酬江夏友人見寄

四海元龍眼界空平生豪習竟誰雄
早知黔首成秦贅悔學娥眉入漢宮
曲水踈篁秋色裏小山叢桂月明中

故人歲晚能招隱，便買扁舟向漢東。

京師上元夜

華月澄澄宿霧收，萬家燈火見皇州。
天闔虎豹依霄漢，人海魚龍混斗牛。
公子錦韉鳴玉勒，內家珠箔控銀鉤。
道傍亦有揚雄宅，寂寞芸窗冷似秋。

送袁果山經歷之潮陽

潮陽贊府之官去，猶是薇垣白髮郎。
天上故人懸夜榻，海邊候吏促春裝。
翠綃卷雨蕉花老，火齊然雲荔子香。

終日韓山對簾幙祇愁簡牘破詩忙

留別凱烈彥卿學士

十年帝里共鳴珂別後悲歡事幾多汗竹有編歸太史
雨花無迹染維摩湘江夜雨生青草淮海秋風起白波
明日扁舟又南去天涯相望意如何

唐宮題葉

彩毫將恨付霜紅恨自綿綿水自東金屋有關嚴虎豹
玉書無路托鱗鴻秋期暗度驚催織春信潛通誤守宮

莫道銀河消息杳
明年錦樹又西風

崔徽寫真

舞鸞妝鏡拭鉛華
毫數無聲散彩霞
夜月影寒分桂魄
春冰葦薄映桃花
夢隨圖去憑青鳥
愁逐書來點墨鴉
未得離魂如倩女
衰容先到君家

洛神

鄴宮簷瓦似鴛鴦
飄蘭渚鳴鑾去國遙
謾說君王留寶枕
不聞仙子和瓊簫
驚鴻易沒青天月
沈鯉難憑碧海潮

腸斷洛川東去水野烟汀草共蕭蕭

送蘇伯脩御史之南臺

天上詞臣曼莫雙乘驄此日蒞南邦梅花路近宜逢雪
桃葉波平好渡江千里蒼生瞻繡斧十州使者避旌幢
同袍知己如相問已許閒身老北窗

送趙秉彝親迎江夏之官臨川

婀娜新衣錦繡重美人今夕過湖東一聲鐵笛千家月
十幅蒲帆萬里風孔雀畫屏占貴客甘棠遺樹咏先公

墨池光動凌雲筆春滿花封賦更雄

送蒙古學教授之邛州

玉貫珠連我國音亂山深處變巴吟蒼虬挂屋寒節瘦
白鶴懸巢古棧深座冷一羶知宦况書來萬里見鄉心
文翁課最同文盛應譯嘉謨到上林

二喬

珊瑚樹交如玉樹重鴛鴦難偶雪難容共思漢事隨流水
各對吳儂感遠峰洛賦未成梁月墮胡笳已斷塞雲濃

人間流落渾相似猶勝淒涼泣暮蛩

二月梅

去年呵筆賦寒梅又見仙家二月開不是東君留客醉
肯教神女逐春回梨花院落為雲妬柳絮池塘作雪猜
東閣如今清興減羅浮誰與寄香來

附謝宗可詠物詩

藕花風

舞罷紅衣起未休水雲香裏冷颼颼三更清逼銀塘曉

六月涼生玉井秋
颭浪低翻霞影亂
凌波輕漾錦香浮
莫教吹醒鴛鴦夢
好送真人一葉舟

曉色

遠似烟霏近又空
非明非夜兩朦朧
一天清露洗難盡
幾樹暗雲遮不窮
斷角樓臺濃澹裏
殘燈院落有無中
蒼茫半逐雞聲散
又被朝陽染作紅

睡燕

補巢銜得落花泥
困倚東風倦翅低
金屋晝閒隨蝶化

玉堂春靜怕鶯啼魂飛漢殿人應遠夢入烏衣路欲迷
却被捲簾人喚醒小橋流水夕陽西

筆陣

授策登壇拜墨卿霜毫不用鐵為兵戰酣已拔三都壘
奏捷還攻五字城怒捲龍蛇雲霧泣長驅風雨鬼神驚
攀蟾獨掃千軍退功奪中書第一名

走馬燈

飈輪擁轉駕炎精飛繞人間不夜城風鬣追星低弄影

霜蹄逐電去無聲
秦軍夜潰咸陽火
吳炬宵馳赤壁兵
更憶雕鞍年少客
章臺踏碎月華明

梅杖

紫玉槎牙蝕蘚痕
黃昏扶醉倍精神
一枝冷曳孤山雪
八尺橫拖庾嶺春
江路策雲香在手
溪橋挑月影隨人
歸來却笑林和靖
還現堂中上座身

混堂

香泉湧出半池渰
難洗人間萬古塵
混沌殼中天不曉

淋漓氣底夜長春
波濤鼓怒喧風雨
雲霧垂陰護鬼神
却笑相逢裸形國
不知誰是浴沂人

詩瓢

雨蔓霜條老翠壺
吟邊不是酒葫蘆
剖開句裏玲瓏玉
着盡胸中錯落珠
滿貯苦心留宇宙
深藏清氣付江湖
誰家半腹能千首
為問山人果在無

蓮葉舟

穩棹紅衣泛渺茫
風帆浪楫水雲鄉
曉撐泰華半峰月

夜載西湖十里香藕放雪絲應作纜荷歌翠柄若為檣
不須更捧金仙足太乙真人夢正涼

仙槎

曾作河源萬里舟塵根已斷卧潛虬無心下土承烟雨
有路層霄犯斗牛破浪遠衝銀漢曉凌風竟度碧天秋
歸來載得支機石誰識人間博望侯

無絃琴

獨繭長纒底用抽蛇紋空鎖鳳枝秋落星有色寒光斷

凍瀑無聲練影收
別鶴那聞風外泣
孤鸞不向月中愁
多情只有柴桑老
寂寂山高水自流

紙帳

清懸四壁剡溪霜
高卧梅花月半床
璽甕有天春不老
瑤臺無夜雪生香
覺來虛白神光發
睡去清閒好夢長
一枕總無塵土氣
何妨留我白雲鄉

醉鄉

曾笑三閭不解遊
移家欲向麴城頭
人酣方外鴻荒夢

誰識塵中富貴愁
夜月放船遨酒海
春風扶杖上糟丘
相逢還似無何有
喚起東臯為贈侯

塵

人海深藏混混中
非烟非霧遠空濛
六街錦繡迷香紫
九陌笙簫踏軟紅
微步緩隨羅襪起
清歌飛繞畫梁空
南來一騎蛾眉笑
又送長安荔入宮

綠萼梅

綠萼仙人下玉堂
清魂夜化雪芬芳
荷衣薄襯霓裳冷

蘭佩濃薰綃袂香曉額浮酥凝淺黛芳容點翠照新妝
多應誤入羅浮夢愁絕黃昏鬢已蒼

問梅

尋春踏雪過西湖試折風前玉一株香影為誰甘寂寞
精神何獨占清癯鐘殘角斷愁多少月落參差夢有無
吟遶南枝還不應好將心事問林逋

苔梅

一夜蟠龍裂翠鱗土花深護玉精神蒼寒滿樹黃昏月

碧老孤根太古春
姑射香薰荷製好
逋仙清入草衣新
料應不為天風冷
自恐冰肌受點塵

蟠梅

縈青絆碧裂蒼苔
晚歲寒香宛轉來
蛟舞凍雲冰骨瘦
龍眠夜月玉鱗開
風霜氣勢從千折
鐵石心腸亦九迴
祇為東君甘自屈
不教虛占百花魁

紅梅

梨雲無夢倚黃昏
薄倩朱鈿蝕淚痕
宿酒破寒薰玉骨

仙丹偷暖返水魂
茜影露羅衣捲霞佩香封縞袂溫
回首孤山斜照外
尋春誤入杏花村

鴛鴦梅

兩兩翹春簇錦機
文衾夢覺月分輝
枝頭交頸棲香暖
花底同心結子肥
金殿鎖烟妝粉額
玉堂環水浴紅衣
有情一種隨流水
莫被風飄各自飛

雪中梅

苔珠擎重半朦朧
漠漠黎雲夢不同
香護嫦娥眠玉洞

影隨姑射下珠宮
冰蟾光照南枝夜
翠羽聲淒曉樹風
天上人間渾一色
幾分春色有無中

石倉歷代詩選卷二百三十七上

欽定四庫全書

石倉歷代詩選卷二百三十七下

明 曹學佺 編

元詩七下

袁桷

觀真文忠公畫像

羣賢輔絕學嵯峨武夷峰
熒熒方瞳光汲汲汗簡中
緬懷文明初蒼珮極匪躬
執筆侍玉署妙語工彌縫
飛塵

變蒼狗潛淵閱游龍空餘經濟心勞徠饑飛鴻濁水投
神膠揚清迺奇功喬松不並世寒飈轉秋蓬生世我已
後正緒遺顓蒙惕然拜公像斯道非終窮

芳思亭 大公尚書公治圃南郊有堂亭凡十

五方池脩廊屈折便宜雨甚亦無礙遊事逮
今荒廢踰四十年故基陳迹不復可考近築
一亭雜植花木廣不踰畝髣其萬一名之曰
芳思玩其英華將以紬繹志興翰墨有紹是

則先公之志作詩示瓘瓘併求親友同賦

侃侃尚書公投紱理泉石五堂適寒暑十亭送昕夕瓊
英玄圃秀美蔭嘉樹碧脩廊不受雨來往隨履舄紅雲
漲方塘丹霞耀翠席嘉魚黃金掌瞥見眇難測辛勤三
十年深逝晦朝蹟遺訓示子孫樹藝比其德浮雲變須
臾百幻倏消蝕空餘鄭公莊耕稼給衣食緬彼行樂時
衆植各有職以茲一畝園髮像見疇昔幽葩與羣卉生
意日不息朝陽漱靈根三咽妙絢繹曠懷事幽賞誓矣

躬六籍

次韻虞伯生夜坐

炎晶爍草露木末望西顥靜躁誰為尸翕忽紛寸抱志
士法天運炳燭不在老羣經固其邪積神以為寶陋彼
多言生希名太玄草山林詎心違歲月付幽討擾擾徒
為名努力在此道

其二

地氣環中州橐籥均宇內中宵炎淥頻露坐猶憤憤遠

窮太古雪欲往終有徕馳神極寥廓我筆不可載栖形
竹素園萬化等歷塊相期江湖深慎勿寒暑礙秋風起
天末紉蘭結幽佩

度淮寄養浩

竹清寒房靜殘月在西壁悄悄燈景微尸坐棄枕席井
華飲蟾蜍玄雲成五色明知非世謀精詣在六籍我行
長淮浪凍樹挾春碧夢予白紵寬雙眸烟空激書來屢
在手此意何的的數面不成歡遠別迺復惻歸雁臨風

翔先之寄深臆

懷伯生

春雨消路塵春風散林纈蕩蕩長安門客子千萬轍城
陰有一士淡食羹不啜采彼松上雲煮石化晴雪沈冥
護真性觴至那復說向來舌本談今作耳根熱維南有
樛枝岩溜滋百結在德良自防居此詎為折念之長夜
深寒光吐殘月

史氏報春堂

白雲在屋角凱風生樹端下有慈竹叢低昂候平安盈
盈玉雪母光若赤瑛盤朝奉鶴禁思暮承龜臺歡教兒
誦經史清言消綺紈築堂深且明朱光映庭蘭寸心諒
匪石寵辱非所干世故疾危岌奉行身愈完願言樹明
德朝夕應加餐

育王珙禪師示寂二紀嶼上人回山中因寄塔
主

石塔累荒土月落冰稜稜永懷跣趺叟松風吹不磨山

房舊淨供素壁一枝藤語寂絕禪觀機深超祖乘擊石
并新火諸天化為燈上有白玉峰丹梯杳難登黃流鉅
野漲虎嘯懸厓崩斯道倘未泯微言足搜徵

飲酒雜詩

春至舊疾作晝眠聽禽聲總角耽六籍萬化何縱橫觀
象太極初始悟無虧成環中秘靈根羣動一以貞吾欲
乘彩鳳截篴以為笙上窮崑崙渾下探渤澥清

其二

夜暝雪初白高卧益自怡起看庭前柳冉冉青春姿長
松在西山鬚髮流銀澌豈不念歲苦壯者當固持事至
勿獨歲時來詎人為得酒且深醉淵明果吾師

其三

京師二十載酒中有深歡大雨即閉戶朔風嘗解鞍客
至輒笑之是豈宜居官振容筮神著鴻飛漸于磐百歲
告世短萬鍾非我干所以東方生吏隱神益完

其四

陽鳥乘南雲飄飄振奇翮迫此梁稻謀居移遂成客愧
我食京塵誓墓志未獲雙峰十大松下有千載魄當年
侍蓬瀛香芸森寶冊高齋集遺編朱墨猶手澤戰兢愧
匪承永念在行役

其五

少欲觀滄海下取珊瑚枝宮龜負玄文靈鱗揚朱鬣盪
舟不能往寶氣時紛披有客方壺來授簡雲差差一以
參太極九以師庖犧振衣海神泣舉觴山鬼移少觀五

嶽形五性各有殊神州養深知百靈受驅馳申申安樂
翁定洛為中居神京屹金臺五雲玉芙蓉始知天經旋
積氣為堪輿

其六

家鄰天台山云有二子岩巍嵒太古石纖脩矗雲尖上
棲西竺僧雪色垂鬚髯二子與之遊作詩清且嚴乳花
散瓷甌瀑布飛銀簾醉醒夢見之謂我何留淹

其七

南簷孤竹生歲暮何青蒼豈不念道里因之摧雪霜夷
齊盧龍居胡為乃名揚入水蛤有文踰淮枳彌芳受性
諒匪移臨風酌吾觴

其八

弱冠不飲酒篝燈橫玉繩或云酒中趣湛湛浮雲蒸棗
書試其言果若烏輪升天根轉暗雷堅城為之崩妙言
梁瓊屑逸興追飛鷹醉鄉倘可居無功乃真朋

其九

江梅生空林歲晏美無度挈身踰朔易愧獨此室處
羶房望朝陽耿耿不得語雕籠梁珍禽悵望秦鄉樹爰居
東門止盛饗非素茹臨風嗅其英雅志懷故土

其十

嵯峨白雲阡種松在山腰散之不盈掬離離如麥苗迎
陽漱靈津參差拂雲霄露重碧天淨玄鶴時來巢俛仰
二十年鬢齒日以彫寄聲謝玄鶴相期躡宮堯

哀蘭操悲吳亢也

幽蘭兮秋風
炯命兮不逢
剌剌兮素蕤
零露兮莫持
望崇岡兮不得
返悵江南兮
愈遠叢棘兮
萋萋欲駕兮
無轅子中野兮
屏營芳隕失兮
玉零謂我為非
人兮吾何辭已
兮已兮其將何
之幽蘭兮忽悲
生失據兮死有
期思夫君兮意
不極從造化兮
何隙

煮茶圖一卷
髣石窗史處州
燕居故事也石
窗諱文卿字景
賢外高祖忠定
王曾孫儀觀清
朗超然綺紈之
習聚四方奇石
築堂曰山澤

居而自號曰石窗山樵此圖左列圖卷比東
如玉筍錦繡間錯旁有一童出囊琴拂塵以
俟命右橫重屏石窗手執烏絲欄書展翫疑
有所構思屏後一几設茶器數十一童偃背
運碾綠塵滿巾一童篝火候湯感肩望鼎口
若懼主人將索者如意塵尾巾壺硯紙皆纖
悉整其羽衣烏巾玉色羣起望之真神仙人
云

石窗山樵晉公子獨鶴蕭蕭烟竹裏月湖萬頃碧瑠璃
高築虛堂水中沚堂深六月如深秋萬柄風搖紅旖旎
遵南更有山澤姿對面晴峰插天倚憶昔王門豪盛時
甲第如雲總朱紫曉趨黃閣袖香塵俯首脂韋喪厥美
一官遠去長安門德色欣欣對知己豈如高懷脫榮辱
妙出清言洗紈綺羣符一試不挂意岼幘看雲卧林墅
平生嗜茗苦有癖古井汲泉和石髓風回翠碾落晴花
湯響雲鐺袞珠藥齒寒意冷復三咽萬事無言歸坎止

何人丹青悟天巧落筆毫芒研妙理黃梁初炊夢未古
舊事淒零誰復紀展圖縹渺憶遺蹤玉珮珊珊響秋水

玉署鰲峰歌答伯庸

女媧五色餘刀圭化為蓬萊東海之虹蜺神君方瞳怒
凝睇不如百鍊積鐵之方圭日有三足鳥其光映顧菟
海有三足鰲神山簸靈濤吐吞出沒無定時一叱使之
來玉墀大承虛皇小挾銀漢黼黻帝裳追琢廟瓚森嚴
聳巖鎮帝署百鬼却走不敢侮粲若珊瑚枝熠熠三秀

姿文理密察儼素樸乎尹旁達藏玄機我昔坐其側耳
冷心彷徨經旬卧向壁夜夢天孫手授雲錦交龍章漆
書誥盤傳古昔中有寶珠杳無跡散之六合捲如席視
之不見聽以息元氣氤氲龍馬興文茲石點首詔爾小
臣慶非烟霧出如絲綸矢心濡筆靡有數萬古作式永
無極

次韻蔣遠靜

唾壺塵尾手所持白眼對客客不知出門俗子多敗意

三語之掾真吾師曉窗新沐綠陰淨碧雲奇峰生九疑
隔隣書聲入幽耳茶甌散花酒浮蟻百年行樂在適意
燕領頭顧空萬里君不見燕山俠客多苦寒出門悲歌
來日難

越船行

越船十丈青如螺小船一丈如飛梭平生不識漂泊苦
旬日此地還經過三江潮來日初晚九堰雨慳河未滿
當時却解傍朱門醉眼看天話長短年來官府催發綱

經月辛苦鬢已霜布裘漫作解貂具入門意氣猶猖狂
自古魚鮭厭明越明日今朝休論說買魚沽酒不計錢
被髮江頭傲明月歡君莫作越船婦一去家中有門戶
沙上攤錢輸不歸却向隣船盪雙艣

九月望日送姊歸余氏先塋

沈沈大士閣千嶂萬夫降近樹青禽獨前松白鶴雙雲
霞生几席星斗列軒窗俛首京塵客生涯愧老龐

其二

慙愧雙峰老光明兩足尊午窗釣竹影凍筆點梅魂齋
近烏啼樹禪迴虎伏門春來有新雁勸我趣歸轅

其三

經院辛勤日千金記始興雨荒蟲蝕拱壁壞鼠緣藤舊
觀丹青復諸天錦繡承短簷增突兀會見出盧能

其四

陰陰虞監宅鬱鬱越公祠掬米不入獻布金猶受疑流
年翁仲守往事苾芻知澗水交流處曾傳玉帶垂

其五

寒徹清泉底山童上水華定金非在井煮米却成沙洗
目能生電搜腸可當茶人持一月去此月落誰家

次韻元復初春思三首

凍樹同青陽羈禽競新哢喧喧人語浮稍稍春事動澄
心絕芳華小睡足幽夢頓覺天宇新朝光集飛棟

游塵逐平臯秀色翳林莽油雲互東西鬱抑不能雨昭
蘇注玄功竟夕復延佇何當採金鷲振翮窮委羽

遠客芳草思湛湛天外舟坐令親知疎低徊此淹留古
樹擢奇石清流匯芳洲素心諒有在胡不為茲游

送邵元道四首

仲連匡世資揮手却秦軍掩袂停白日登車抗浮雲射
書誠草草孤城死生分辭榮敦厚俗矯抗離其羣

虞卿舌轉丸揣事精微芒言危見交態窮愁名益光黃
金散逝水白璧凝飛霜丈夫有定志得失非豫防

梅生一尉微喋喋正天紀道心洞玄化削跡無妻子龍

變孰為馴蟬蛻乃真止松迴風設設水落石齒齒
襄陽孟浩然拂衣歸故山逍遙巖壑深流水遺人間舉
袖林花落擊楫江鷗還鹿門看碧流入夢日潺潺

送蘇子寧赴嶺北行省郎中

貂帽護寒沙冰天閱歲華斷溪馳聽水密雪犬行車雲
盡難尋雁春深不見花昔人奇絕處八月解乘車

其二

往歲經遊地寒蕪碧燐深雲開山後陣水咽隴頭吟雪

白檀房重天青羽檄沈重華新雨露悲喜候車音

書懷寄從子瑛

越公舊築鄞江宅風捲飛花劫火新子竟尋真餐白石
我方脩史玩青春金張螭綬元欺世王謝烏衣亦可人
誓墓政須堅晚歲雙峰擁髻碧嶙峋

次韻天童岫禪師

太白峰高積翠明老禪的的寄深情相思沙磧惟懷璉
獨立鄉臺近子卿舊業久荒松露立浮名空眩槿朝榮

定須結社脩真隱寒月深燈了梵經

題郝伯常雁足詩

深羈孤館鬢毛斑猛虎搖鬣障海寰玉樹已歌歸逝水
羽書難射隔平山不須羝乳終回漢肯學雞鳴詐度關
一寸蠟丸憑雁寄明年春盡竟生還

送雪竇長老校經回里

翠鎖公闕疊疊高坐看明月負金鰲已將禪板傳心印
暫下繩牀衣毳袍聖諦無聲機獨露經筌有誤目難逃

塵中白髮誰消得歸掩山寮聽雪濤

次韻昌國宗聖上人

海上秋潮候月生島中瑤草不知名每思大士超禪觀
獨恨秦王苦望瀛龍吐戒珠殘照影雁橫書信故鄉情
妙年碧眼才翻錦為念衰翁強入城

五月二十日甘雨如注江南呼為分龍雨

平疇龜坼禱龍君百頃青黃兩界分
匝岸已霑三尺雨隔溪惟見一川雲
誰家襖襖涼如水此地祇祠火欲焚

共道神功有南北老農元不廢耕耘

送王繼學馬伯庸上部二首

玉京高處雪流脂連轡馳驅凍翼垂蹠踐有泥歌獨漉
琵琶無夢說相思黑河新樂催填譜白海名花擬進詞
羽獵上林俱罷賦卿雲何以報名時

淺波平疊磧漫漫拂嶺青帘罨畫看瓊屋起營羊胛熟
土房催頓馬駟乾桐官走驛傳金碗冰正分奩貯玉盤
莫上鄉臺望南北白雲微處是槍竿

觀物

黃河不信從天下濟水那知有伏流自古乾坤合神化
空將簡牘費冥搜張華博物身終死鄒衍談天舌竟休
我亦從今銷綺語春風碧眼玩沙鷗

寄開元奎律師

雙塔亭亭透夕陽芭蕉深處碧窗涼江神夜聽光明偈
天女朝分解脫香齋鉢午空鳥守樹經堂雲冷鶴歸房
平生欲結西方社似怪淵明作吏忙

無題次馬伯庸韻四首

金縷歌殘月滿江
玉顏曾憶侍油幢
象牀雲重恩專一
鯨錦波翻賜疊雙
春淺正宜擅作幕
夜涼深恨魀為窗
浣紗可是無虛匹
側足寒流濺石淙

翠簾匝匝護朱光
千葉宮桃滿院香
閨苑有鸞通尺素
虛橋無鵲寄流黃
上林賦罷歸巴蜀
興慶詞工謫夜郎
不是月中親度曲
世人那解聽霓裳

相期來似石頭潮
日望晴虹結綵橋
却月眉愁歌漸遠

凌雲步近意非遙
抽琴有恨迴清角
疊袖無塵轉綠腰
弄玉最憐隨鳳去
秋來誰與伴吹簫

白髮詞臣兩耳垂
華腴堆笏陋牛醫
宮娥引燭催麻日
院吏傳更寫制時
蠟撚化生秋夕
賜幢標綵勝
歲華移
低頭欲說唐朝舊
願侍虛皇進玉卮

送華山隱者

黑髮詞官佩水蒼
萬松深處響琳瑯
黃柑有法能為酒
紫朮無飢可代糧
招鶴舞空山月冷
檄龍吹雨海風涼

瑤池欲問長生訣
碧澗研朱寫綠章

次周侍御回朝

娥眉班肅整皇皇
匝匝松陰陋午光
舞翻當軒催進酒
開函登陞促傳香
六龍捧御雲中日
三象輪琛海外洋
欲識兩宮清淨理
薰風殿角漏初長

馬騎燈

功著凌烟作戰場
宵征勇將太匆忙
不聞號令齊驅疾
自覺銜枚去路長
燭著春風鑒赤壁
光浮夜月燬阿房

誰能跳出機關外不為功名紙半張

碧筩飲

甘露無聲墜玉盤中天飛影動琅玕
壚頭太白塵埃熱石眼空青冰雪寒
水泄尾閭來瀚海手扶砥柱障狂瀾
麴生不用忙傾蓋吸盡清香見肺肝

寄子昂

故國王孫佩楚蘭春雲涼月倚朱欄
玉簫曲趁鶯聲轉金鼎香隨蝶夢殘
碧沚波清堪把釣黃塵風急倦彈冠

外家文物惟君在笑我冰姿跨曉鞍

俞允遠治余別墅口占奉謝

種竹澆花俟我還花成雲塢竹成山相逢且說相思恨
更說何時得共閒

寄天童岫長老

太白山高雪四圍孤峰翠織五銖衣誰言老子寒無力
獨擁紅爐更下幃

翰林故事莫盛于唐宋聊述舊聞擬宮詞

禁鐘初動趣傳宣
衣袖薰香到御前
漸近宮門扶下馬
內官分引導金蓮

御筆圓封草相麻
龍牋香透擁金花
儀鸞勅設庭前候
賜酪方終更進茶

制草塗鴉未敢剛
內璫宣引侍龍顏
已分筆格金蟾滴
更賜端溪紫硯山

春帖分裁閣分多
宮娥爭餽纈羅青
絲菜餅銀盤送
幡勝新題墨旋磨

文思如泉涌墨林屏風院吏不須尋舊時內相諸孫在
猶有當年掃閣金

清馥香溫玉酒卮祝文新撰報都知夜來奉旨傳承相
五朵雲濃押省咨

天孫夜度玉橫清內托銀盤湧化生秋思未多團扇在
擬題宮怨月分明

天童山圓上人遠來開平訪華嚴以舊詩求題
三尺枯藤一卷詩五千里外訪相知鄉音未改眉毛在

曉過嶺西聞子規

海狗巢石圖

絕壁層峰負六鼇
藥欄花檻翠周遭
如何畫史同羣吠
不與君王繪旅獒

葛仙翁移居圖

翁媪相携入翠微
轉頭猶有可憐兒
丹砂不是神仙藥
勾漏歸來鬢已絲

宮女度曲圖

望瀛法曲紫霞觴更按伊州奉玉皇翠竹涼深宮院密
新聲那得過宮牆

次韻王繼學竹枝宛轉詞

聞郎腰瘦寄當歸望盡天邊破鏡飛昨夜燈花圓似粟
倚門停却送郎衣

石倉歷代詩選卷二百三十七下